

特114

660

南都游草



始



特114
660



南都遊草題詞

山河樓觀接蒼蕪。王氣依然景象殊。寫入詩中秋如畫。

滲金渲碧舊南都。

金粉繁華半廢殘。國風今尙說青丹。詩人別有白描筆。

山月宮花掌上看。

畝陵燎火談峯駕。鳩寺鐘魚菟水船。一卷分明鴻爪迹。

臥遊令我飽風烟。

甲子春日

擔風學人服部轍

13. 6. 28
內交

南都游草

知多 礫浦 小田俊作著

癸亥古重陽後一日將啓行南遊題書窓壁
減將衣食買貧遊。覽勝探奇老未休。可似衲僧行色冷。
打包一擔出鄉州。

次日訪服部碧瑞君子尾西鯛浦。遂留宿賦
此以道謝呈政

穉稔連村鳥雀譁。蘇江東畔訪君家。霜前丹淺園楓色。

節後黃酣籬菊花。席暖溫談情曷盡。杯深美酒醉無涯。
琴高斫脰珍羞足。蔬圃秋寒更進瓜。君善園藝故云

是夕謁擔風先生恭賦即事一絕呈正時鼓

浦建碑竣工正在近

二十八字刻初全。鼓浦詩碑搨本傳。偶謁先生何僥倖。
登堂拜手誦瑤篇。

其翌碧瑞君特設詩醺于其後堂招請擔風
先生及勝崎耐軒服部柳涯數賢以見盡一

夕之歡。余亦陪焉。即席上賦此以呈先生郢

正兼道謝主人云

草堂詩醺敘天倫。列坐交歡兩舊新。儒雅風流仰夫子。
傲頑麤率愧脩人。南都名勝話千載。北海芳樽酒百巡。
老對諸賢謝頽放。醺酣露頂脫烏巾。

笠置道中

鸞輿一去賸青山。奈此當年天步艱。笠置道中孤客感。
誦將睿藻淚潛夕。

木津途上

山抽碧玉尖々聳。江碎清瑤滾々流。應接未遑關左景。
連呼奇絕過城州。

南都懷古

南都文獻迹。仰古思悠々。俊乂隋唐學。聖僧嵩洛游。典
章翕然備。教化所來由。我黨不精勵。舊恩何以酬。

南都雜詩

春日祠前曳杖行。老杉古檜路縱橫。藤家舊奠向誰問。

只有呦々神鹿鳴。

劫火經來記昔年。仰瞻巨像尙依然。金身丈六無量壽。
不許宋人銷鑄錢。

佛顏三度竟無言。東大鐘聲欲斂昏。游屐尋秋春日野。
閑身伍鹿亦神恩。

鼎鐘百代青銅蝕。樓觀千年金碧殘。拜佛賽神探勝遍。
南都古色與誰看。

詩人客感付杯觥。不似當年阿晁卿。三笠山頭今夜月。

醉看千古一輪明。

截角祭前鹿存角。赭山節後草萌山。僮夫不解王孫恨。
青入燒痕遊復還。

神燈萬炷貯香煤。鹿角煎膠最稱材。始信南都製佳墨。
古梅園舊擅名來。

佛塔三層仍五層。勢衝霄漢欲飛騰。鬼工千載人爭仰。
誰拜舊都十二陵。

七朝宮苑委荒墟。野老無心來手鋤。可惜甘棠伐都盡。

黍離何處舊皇居。

三笠山連手向山。鬱葱佳色注眸間。依々千古昔賢迹。
咏得遺篇對碧孱。

般若寺有感護良親王事

身避豺狼匿梵宮。洛畿歸賊奈孤忠。經函緩死恐方便。
嫁禍他時土窟中。

春日山幽討

苔逕紆餘洞壑幽。泉聲林籟共蕭颺。去尋鶯瀑鶯無語。

春日山中獨聽秋。爲瀑地名

討秋吟向洞門中。九月新霜未染楓。天爲遊人補詩景。
斜陽一帶逗梢紅。

樹々々梢紅未收。斜陽影裏弄霜秋。觀楓此段得余意。
故後歸鴉且小留。

洞楓映出夕陽前。滿目秋光錦作天。飽翫紅於思本事。
令人心折杜樊川。洞楓地名

謁桃山陵

中興帝業典型存。丕績追懷覆燾恩。威德祇今何以比。
扶桑日上照乾坤。

謁樞原神祠

萬里膺懲奮向東。凱旋定鼎震天功。仰欽皇祚百千世。
肇兆艱難祖業中。

拜神武陵

蒼鬱林邱踧踏登。跪來神域感偏增。此中草木皆堪敬。
閱歲三千護古陵。

南都游草
多武峯謁鎌足公祠堂

琪樹瑤岑映畫甍。崇祠千古倚崢嶸。威稜不減雲臺像。
勳業長垂竹帛名。雅頌倩誰援健筆。潔縈有客薦嘉盛。
懷哉太極除魑魅。霜鏢一揮天地清。

同山途中作

山腹有談所森舊迹傳云是公
昔日爲謀議之所

林巒廻台似重垣。談所至今陳迹存。落木西風吹颯々。
如聞往昔辨姦論。

詣黃檗山萬福寺

高僧名蹟賁香臺。偈句楹聯總妙哉。字々如珠猶若佛。
神光離合射眸來。

朱家天子奈蒙塵。六合何依可寄身。不及高僧東泛海。
別開法界度迷津。

同寺觀豐公茶室有感

霸圖事去已迢々。地下豐公恨叵消。留得當年遺物在。
佛恩長護一茶寮。

喫普茶

調理筍蔬風味嘉。伊蒲擬得似僧家。自今將懺何郎肉。
黃檗門前喫普茶。

途上口占

培將嫩綠近僧家。村女嬌歌摘露芽。此地園々擅名久。
品題孰與趙州茶。

鳳凰堂

藤相權豪夢一場。此鄉尙賸古禪堂。祇今誰記當年盛。
身後虛名付鳳皇。

宇治弔賴政自及迹

懺悔武門歸佛門。眞蓮入道豈銜冤。扇苔何物數弓地。
賸染當年碧血痕。

泛宇治川同松本泗水村。田德治郎兩賢及
服部學圃。兩賢是學圃舊識而於余皆爲新
知也

溪山幾曲競呈奇。湍急篙夫力僅支。翻好容與覓新句。
扁舟欲上更遲々。

舟與水爭徐溯洄。倚舟客恰有詩催。中流激棹瑠璃碧。
飛沫沾衣似雨來。

安坐唱酬舟似家。泛遊有友又何加。篙郎著意吹爐火。
菟道水烹菟道茶。

茶竈筆牀縱復橫。扁舟攬景沂溪行。何應喚起天隨子。
箇裏忘機語逸情。

山當船腹訝途窮。行過山腰水又通。棹破清溪數十曲。
恍然身坐翠屏中。

先登陳迹記驍名。菟水泛游無限情。鐵馬奮驤何處是。
奔流猶激昔時聲。

法隆寺

名藍結構仰千年。兩打風吹尙儼然。古佛無言經幾劫。
雛僧向客說前緣。至今夢殿斑鳩在。依舊香龕舍利傳。
滿壁慈雲膜拜徧。誰參妙手畫中禪。

上生駒山

一綫鐵繩牽上山。下山一綫倒懸還。車窓穩倚如平地。

蜀道誰言難更艱。

奈良留宿服部學圃僑居賦此言謝

覽勝浹旬淹舊郡。此間寄傲愜心愉。情親謝爾苦留我。
已忘家鄉併忘軀。

奈良車站留別學圃

老去重遊未可期。與君話別有餘悲。卽今分手奈良道。
殘月霜鐘破曉時。

還家

足迹依稀鴻爪泥。浹旬遊覽夢魂迷。還家囊底檢詩記。
無箇佳篇謝老妻。

--	--	--	--	--	--	--	--	--	--	--	--	--	--

大正十三年六月十五日印刷
大正十三年六月二十日發行

愛知縣知多郡内海町大字内海
字本田三拾八番地
著作兼發行者 小 田 俊一 作
印刷者 岐阜市七軒町十二番地 酒 田 貞 次 郎
印刷所 岐阜市七軒町十一番地 西 邊 印 刷 株 式 會 社
岐阜支店

285
37

終

